

四庫全書

子部

欽定四庫全書

子部
學林卷十

詳校官中書_臣羅錦森

員外郎_臣牛稔文覆勘

總校官編修_臣王燕緒

校對官檢討_臣盧遂

謄錄監生_臣洪文炳

欽定四庫全書

學林卷十

宋 王觀國 撰

孫休四子名

吳志孫休永安五年立子璽為太子注引詔曰名子欲
令難犯易避孤今為四男作名字太子名璽璽音如湖
水灣渾之灣字箇箇音如迄今之迄次子名璽璽音如
兕觥之觥字甬甬音如立磧首之磧次子名鉅鉅音如

草莽之莽字昱昱音如舉物之舉次子名寇寇音如褒
衣下寬大之褒字焚焚音如有所擁持之擁此都不與
世所用者同故鈔舊文會合作之夫書八體損益因事
而生今造此名字既不相配又字但一庶易弃避其普
告天下咸使聞知觀國案古之字書皆篆文其所從偏
旁有陰陽上下左右曲直之形皆義理之所存錙銖之
異而義各有取不徒設也至秦始變為隸雖變為隸然
訓釋其義則悉本諸篆文許慎說文之類是也孫氏為

四男立名字欲其難犯易避夫古字之難犯易避者多矣不用古字而乃妄意撰造自為之音而不言其偏旁所從之義徒欲立異而失先王制字之法茲所謂好異而不為異者乎又第三子字昱音舉今案許慎說文昱音溫即溫字之所從也孫氏其閱字書未廣耶廣韻上聲莽字韻既收鉅字注曰吳王孫休子名入聲祿字韻又鉅字注亦曰吳王孫休子名蓋古人說書鉅為鉅而修廣韻者重複誤收之也梁有四公子名曰驪萬杰桀

曰蜀揚闔丑禁切曰仇掌啓親曰戲贖端端亦好恠之

甚者也隋文帝本封隨國之爵及即帝位乃去隨之走而為隋以為國號案字書隋徒果切其義則落也懈也裂肉也玉篇曰隋亦作墮隋文帝不審其字形離合之義而輕於增損祇取笑於後世耳唐書則天武氏自制十有二字曰墜照而天墜地㊀日国月○星鳳君惡臣盧載鳳初年正而則天自名墜取古人已制之字而改易之意者古人已制之字未盡善耶茲亦可謂贅

矣案集韻載則天自制者十有八字於唐史十有二字之外復有六字如生人字圀國字之類皆見於當時薛稷所書之碑則知則天所自制者不止乎十有二字蓋唐史所載未之盡也至五代南唐劉龔初名巖採周易飛龍在天之義為龔音儼以名茲又見其不知量也

守

守字音首音狩二音太守之守當音狩案廣韻上聲守字音首注曰主守也去聲守字音狩注曰太守也舜典

巡守止用守字春秋僖十二年老氏傳曰王以上卿之
禮饗管仲仲辭曰臣賤有司也有天子之二守國高在
杜預注曰國子高子天子所命為齊守臣陸德明音義
曰守手又反又僖二十四年老氏傳曰天子蒙塵於外
敢不奔問官守杜預注曰官守王之羣臣又傳曰衛人
將伐邢禮至曰不得其守國不可得也杜預注曰守謂
邢正卿國子又僖二十八年左氏傳曰奉夷叔以入守
又文七年左氏傳曰箕鄭居守又宣十年左氏傳曰凡

諸侯之大夫違告於諸侯曰某氏之守臣某又昭公二十三年左氏傳曰古者天子守在四夷天子卑守在諸侯諸侯守在四鄰諸侯卑守在四竟陸德明音義皆曰守手又反蓋手又反者讀音狩也時未稱太守然亦音狩也顏延年五君詠曰仲容青雲器實稟生民秀達音何用深識微在金奏郭弁已心醉山公非虛覲屢薦不入官一麾乃出守此正用太守字者狩也然則凡稱太守皆當讀音狩可知矣又如宿字音肅音秀二音凡天

星皆當音秀若二十八宿列宿之類是也又宿留二字皆去聲讀為秀溜漢書郊祀志曰天子至東萊宿留之數日無所見又曰宿留海上與方士傳車孟子曰於崇吾得見王退而有去志趙岐注曰不欲即去故且宿留廣韻去聲曰宿留停待也然則宿字二音讀之當分別不可混也又如枕字分上聲去聲二音若枕股而哭枕轡而寢飲水曲肱而枕之枕流漱石與夫枕戈枕江之類皆去聲也上聲為實字去聲為虛字二聲有辨也至

如臚傳鴻臚之臚音廬而俗讀音盧潁川潁考甫皆音永而俗讀音郢璟玉璟明之璟音炯而俗讀音景若此類皆非有假借音也俗誤讀之耳

寧寧

史記秦本紀太史公載賈誼過秦論曰六國之士有寧越徐廣注曰或自別有此人不必寧越也觀國策古人寧寧二字通用故史記酷吏傳有寧成而前漢酷吏傳有寧成乃一人也又前漢地理志上谷郡有廣寧縣晉

書地理志上谷郡有廣寧縣則寧寧二字通用也史記
魏世家曰通韓上黨於共寧徐廣注曰朝歌有寧鄉劉
昭注引史記通韓上黨於共寧則寧寧二字通用也前
漢禮樂志樂歌曰泰尊柝漿析朝醒微感心攸通修名
周流常羊思所并穰穰復正直往寧寧乃寧也前漢王
莽傳曰太后詔羣下勸職永以康寧蓋康寧即康寧也
晉書寧馨兒文士多用作寧馨以此考之則過秦論所
謂寧越乃寧越也徐廣以謂自別有此人誤矣春秋左

氏傳曰陳靈公與孔寧儀行父飲酒又曰納公孫寧儀行父於陳而公羊傳曰納公孫寧儀行父於陳蓋寧甯通用也禮運曰諸侯非問疾弔喪而入諸臣之家是謂君臣為謔鄭氏注曰陳靈公孔寧儀行父數如夏氏陸德明音義曰左傳作寧公羊作甯各依字讀觀國案陸德明謂各依字讀則讀寧為平聲讀甯為去聲矣陸德明初不悟二字通用而云各依字讀非也

冰

許慎說文欠字音兵冰字音凝亦作凝今詳說文欠字只從重入其冰字乃凝字無他音不知後人何故以冰為欠而音兵也蓋冰字從欠從水而音凝則於義為正爾雅曰冰脂也郭璞注曰莊子云肌膚若冰雪冰雪脂膏也爾雅用冰字為凝字而莊子亦用冰為凝字而今之書史書用冰音兵者當是秦漢間變篆為隸時所改也許慎後漢人也說文尚以冰為凝者蓋說文本纂集古文而後成古文欠音兵冰音凝不可改故也王文公

筆錄曰李陽冰善篆而不知冰字乃凝字自後只呼為李陽凝蓋戲之也唐故事尚書祠部號冰廳讀冰作去聲言事簡清冷也歐陽文忠公和梅聖俞從登樓詩曰自憐曾預稱觴列獨宿冰廳夢帝關而用水作平聲者但欲順詩句平仄用之爾歐公不應誤也韓愈為分司郎官上鄭相公啟曰分司郎官職事唯祠部為煩且重愈獨判二年日與宦者為敵相伺候罪過惡言詈辭狼籍公牒不敢為恥實慮陷禍故前者懷狀乞與諸郎官

更判觀國案愈啟所言則祠部非事簡清冷之司也當是憲宗時偶然省曹事多而愈適當其任故爾冰又為箭筈之蓋春秋昭公十四年左氏傳曰懷錦奉壺飲冰以蒲伏焉又二十五年傳曰公徒釋甲執冰而踞又二十七年傳曰宣其伐人而脫甲執冰以游杜預注曰冰積圓蓋也積圓是箭筈其蓋可以取飲

參

草書法泉字與參字同形故晉人書操字時作參今法

帖碑本中王操之書皆作參之殊不知參字乃音所減切又音所減切詩曰參參女手是也後漢禰衡為漁陽參搥參音七紺切參搥者擊鼓也文士用參搥字或用為參或用為參皆讀音七紺切蓋假借也徐鉉博學多識時有修字官凡字有從參者悉改從參錯曰非可以一例如漁陽參黃塵蕭蕭白日暗則從參者固不可改槩也衆皆服其說古人草書繚字作參字蓋繚音騷乃繹繚為絲者繚音衫乃旌旗之旂也又草書澡字作參

字蓋澡音早而滲音所禁切也又草書趨字作趯字蓋
趨音躁而趯音驂也若據草書而改變隸體則礙矣又
如草書方字類才字故於字改為於遊字改為遊又草
書繼為迷故斷字改為斷繼字改為繼如此類甚多皆
非法也

員錯屈

唐書員半千其先以忠烈似伍員而賜姓唐書吉王傳
曰員半千為控鶴內供奉唐書音義曰員王問切元和

姓纂去聲負字注備言負半千其先因慕伍負而得姓
則伍負之負音運也負半千姓亦音運也廣韻去聲負
音運姓也注曰前燕錄有金城負敞唐有棣城刺史負
半千則伍負之名負半千之姓同讀音運可知矣春秋
左氏傳凡言伍負陸德明音義皆音云非也音云唯有
鄭姓蓋負亦音云而非姓也緣陸德明音伍負為云故
文士亦作云音用之前賢詩有伍負忠盡江頭死范蠡
功成湖外遊之句作云音也皆陸德明倡其誤也前漢

鼂錯潁川人晉灼注曰錯音厝置之厝顏師古引漢申屠嘉傳序曰責通請錯匪躬之故以韻而言則鼂錯音厝也潘安仁西征賦曰殞吳嗣於局下蓋發怒於一博成七國之稱亂翻助逆以誅錯恨過聽之无討滋沮善而勸惡此又用鼂錯作入聲倉各切蓋隨賦韻之音而借用也然古人假借字音雖多惟姓與名當專一音不可假借他音安仁誤矣廣韻曰屈九勿切屈產出良馬地名也亦姓楚有屈平故春秋左氏傳晉使夷吾居屈

而楚之諸屈咸為卿大夫陸德明音義皆曰屈九勿切
前漢地理志有北屈縣即晉公子夷吾所居也引汲郡
古文曰翟章救鄭次于南屈顏師古注曰屈九勿切前
漢高祖帝紀九年十一月徙齊楚大族昭氏屈氏景氏
懷氏田氏五姓關中與利田宅顏師古注曰屈九勿反
然則屈地與屈姓皆九勿反非屈伸之屈也屈伸之屈
為區勿切讀之不可不別也

稱稱

許慎說文稱字分平聲去聲兩音而无秤字廣韻平聲
稱字處陵切知輕重也去聲稱字昌證切銓度也俗作
秤觀國案禮記月令曰同度量鈞衡石角斗角正權概
鄭氏注曰稱上曰衡稱錘曰權前漢律厯志曰權者銖
兩斤鈞石也孟康注曰稱之數始於銖終於石以此觀
之則兩漢止用稱字未用俗書秤字也用俗書秤字其
晉魏以下乎杜子美寄劉峽州詩曰家聲同令聞時論
以儒稱又曰姍女縈新裏丹砂冷舊秤蓋稱秤乃一字

也一篇詩中押稱秤二字不可也雖然俗書秤字蓋生於草書稱字案草書法再字與草書平字相類因而訛書作秤也字因草書而訛變其體者甚多不特此也

扁

廣韻扁字注云姓也盧醫扁鵲是也又齧字注云姓也莊子有齧缺又嬰字注云姓也莊子有嬰荷甘觀國案史記扁鵲姓秦名越人或在趙謂之扁鵲莊子齧缺王倪嬰荷甘之属皆寓言非真有是人也說者謂齧缺喻

道之不全王倪喻道之端倪嬰荷甘喻隨流而无決者
以至被衣善卷之屬皆類此蓋寓言也如子虛賦之亡
是公烏有先生也字書豈可遂著以為姓耶又前漢古
今人表王倪齧缺被衣皆居第二等誤矣今世傳高士
傳一集盡取列子莊子寓言之人齧缺王倪被衣善卷
之類各立一傳亦誤矣

景

古之日影字不從多只用景字周禮以土圭正日景之

法曰南則景短多暑曰北則景長多寒曰東則景夕多
風曰西則景朝多陰曰至之景尺有五寸又曰識日出
之景與日入之景凡此所用景字蓋謂日影也後人加
多而為影故許慎說文無影字而徐炫字義曰景非設
飾之物不合從多以此知是俗書影字於偏旁之義皆
不可考詩曰高山仰止景行行止鄭氏箋曰景明也有
高德者則慕仰之有明行者則而行之然則景無欽仰
之義而後世遂以仰景為欽慕之義字史記三王世家

武帝制曰高山仰之景行嚮之朕甚慕焉曹丕與鍾繇
曰高山景行私所慕仰凡此用景字未嘗誤也自南北
朝人名有景儉景仁之稱當時誤用景字之義故後之
循其誤者不已而用景為仰慕者浸廣矣有士人慕陶
淵明作景陶軒黃庭堅常見之知其誤用景字用字之
際不可不審也

射

射音麇又音石此二音前賢惟訓說觀國考其義則二

音異義也統言射之名則音麇及致力於引矢之事則音石若射御射法射儀大射聘射射以觀德仁者如射若射之有志凡此皆統言射之名則讀音麇也若射虎侯射熊侯射豹侯射豸射麋射隼於高墉之上射雉一矢亡井谷射鮒弋不射宿孔子射於矍相之圃桑弧蓬矢六以射天地四方左射貍首右射騶虞管仲射齊公中帶鉤射其左越於車下射其右斃於車中子都自下射之顛李廣見草中石射之没羽凡此皆致力於弓矢

當讀音石陸德明諸經音義亦於此音石矣史傳多言
善騎射亦當音石杜子美醉墜馬詩曰向來皓首驚萬
人自倚紅顏能騎射於入聲戟字韻中押則騎射音石
也以此考之則麕石二音其義不同矣漢有大鴻臚射
咸姓音麕吳有中書郎射慈姓音石蓋姓亦分二音也
春秋昭公四年左氏傳曰楚沈尹射奔命於夏洵釋音
曰射食亦反又昭公五年左氏傳曰遠射以繁揚之師
會於夏洵釋音曰射食夜反蓋名亦分二音也不可以

無別

劭

潘岳河陽縣詩曰誰謂晉京遠室適身實遼誰謂邑宰輕令名患不劭五臣注文選曰劭平協韻蓋平協韻者讀音韶也觀國案前漢成帝紀陽朔四年詔先帝劭農薄其租稅寵其強力令與孝弟同科蘓林注曰劭音翹精異之意也晉灼注曰劭勸勉也潘岳詩以遼字劭字為韻則音劭為翹也五臣當別出翹音而曰平協韻者

是於劬音作平協韻為韶音耳蓋五臣未嘗知有翹音而但曰平協韻而已非也南史宋元凶傳曰元凶名劬字休遠初命之曰劬在文召刀為劬後惡馬改刀為力觀國案字書劬字從召從力不從刀也所謂在文召刀為劬者蓋初未嘗考究字義而遽為臆說耳

尊

尊字乃古之酒尊字周禮司尊彝禮記有虞氏之尊夏后氏之尊商尊周尊之類是也又有罇樽二字古文所

不載當是後人所增許慎說文曰尊酒器也廣韻曰尊亦作罇罇從缶從木後人所加觀國以謂詩賦中若用尊字為韻不可更押罇罇二字杜子美奉漢中王手札詩曰國有乾坤大王今叔父尊又曰從容草奏罷宿留奉清罇雖意各別然其實尊罇只是一字譬猶昏之與婚女之與汝爾之有掬與之有歟本一字也苟出於俗書則不可並用以為韻若一字而二音或三音者可也杜子美贈王倚飲歌曰煎膠續絃奇自見又曰只願无

事長相見凡此一字而二音也又子美奉先縣詠懷詩
曰幼子饑已卒又曰貧窶有倉卒又曰因念遠戍卒此
一字而三音者也若尊罍樽三字既本一字又本一音
其可以同韻而押乎字為俗書所增者多矣如回之有
迴園之有園果之有菓欲之有慾席之有蓆裴回之有
徘徊彷彿之有髣髴此其顯然者不可同韻而押灼然
也

刺刺

刺字音次又音戚刺字盧達切二字偏旁音義皆不同
今案刺字從束於篆文為𦏧刺字從束於篆文為𦏧偏
旁異也刺字音次若詩之美刺是也又音戚若陳平傳
解衣羸而佐刺船是也刺音盧達切諡法曰暴民無親
曰刺乃惡諡也漢武帝子燕王名旦者謀反自殺諡曰
刺王王莽賜平阿侯王仁諡曰刺侯唐高祖子元吉諡
曰巢刺王之類是也刺又為乖戾之意前漢劉向傳曰
朝臣舛午膠戾乖刺顏師古注曰刺音盧達反言相違

背也唐書啖助傳曰屬緡不倫序事乖刺韓愈上佛骨表憲宗怒曰言何乖刺耶此類是也刺刺二字異體書之乃可辨

緡疊

前漢食貨志曰萬室之邑必有萬鍾之臧臧緡千萬千室之邑必有千鍾之臧臧緡百萬孟康注曰緡錢貫也顏師古注曰緡音居兩反管子曰凶歲糴釜十緡蓋緡字旁從糸則緡錢貫也今俗謂錢為緡而從金者誤也

許慎說文曰疊古理官決罪三日得其宜乃行之從晶
從宜王莽以為疊從三日太盛改為三田今為疊字非
古也古之戰陳字只用陳字不從車如衛靈公問陳春
秋左氏傳魚麗陳周禮大司馬教戰陳其字皆作陳晉
王羲之作字篇始變為陣字非古也馬廐之廐其字從
广下從段去秋切後世俗書多誤為广下既非也字為俗
書改其體者甚多如顧之頤霸之霸喬之喬獻之獻國
之國廟之廟亂之亂殺之煞趨之趨虧之虧錢之乞齊

之吝學之享齋之条臺之臺寶之室驅之駟樓之栖鹽
之塩甕之瓮總之揔麥之麦兔之兔遲之遲著之着巢
之栗繩之繩飯之飢備之脩凡此皆流俗不曉義理者
咸用之而字書如廣韻集韻亦有取而附在正字之下
者皆非法也如世俗書蠶字作蚕蚕乃音腆也書舩字
作舩舩乃音江也書本字作本本乃音滔也書體字作
体体乃音坊也書闕字作闕闕乃音卞也書商字作商
商乃音的也書須字作須須乃音古文類字也又如宜

寘富寇皆從宀而俗書為宜寘富寇沖況梁涼皆從水而俗書為冲況梁涼厨廳皆從广而俗書為厨廳博協皆從十而俗書為博協凡此類皆失字之本體者也又如炁字音氣出於道書炁字扶泛切出於釋典也字彌也切出於番姓如此猥釀增益者又不可勝紀字學之敝甚矣

盼眇眇

盼眇眇三字三音偏旁不同義亦不同盼從分普覓切

字書曰黑白分也詩所謂美目盼兮是已眇從𠂔音面
字書曰邪視也列子所謂始得夫子之一眇鄒陽書所
謂莫不按劍相眇是已眇從𠂔音眇字書曰恨視也孟
子所謂使民眇眇然將終歲勤動不得以養其父母是
已三字音義雖異而偏旁易於相亂故世俗多誤書當
書盼或誤為眇當書眇或誤為眇左太沖詠史詩曰左
眇澄江湘右盼定羌胡其用眇與盼不相混也俗自易
於混疑耳世言顧眇謂邪視也而多誤讀為顧盼袁彥

伯三國名臣贊曰六合紛紜民心將變鳥擇高梧臣須
顧眄杜子美石硯詩曰公含起草姿不遠明光殿致乎
丹青地知汝隨顧眄蓋於義則有顧眄而無顧盼古之
文士未嘗誤用也世俗多誤讀顧眄為顧盼爾世俗雖
誤讀然文士不可誤讀也

邵邵

邵從召從邑於篆文為𠂔邵從召從尸於篆文為𠂔二
字同音市照切而偏旁不同諸字書曰邵晉邑也又姓

邵公奭之後亦作召詩之召公召南是也諸字書曰邵高也揚雄法言曰種蠱不强諫而山棲賢皆不足邵也又曰年彌高而德彌邵者是孔子之徒與程秘注皆曰邵高也邵邵二字訓義不同不相通用今禮部韻畧去聲收邵字而不收邵字設或賦中用彌邵字為韻遂無韻可押

胄胄

甲胄之胄與世胄之胄同音佻然甲胄之胄下從胄世

胃之胃下從肉若一體書之則為無別矣又如果字古老切上從日也杲字側狡切上從冒也曰音冒從口從二也又如卻字去戟切右從邑卻字去略切右從尸蓋卻姓也晉有大夫卻獻子俗作却者是也卻退也俗作却者是也又如伏字右從犬音服字書曰藏隱也伏字右從大音大字書曰地名在海中也亦如笑字音肖下從夭笑字音替下從大車笑也又如陝音閃從夾內二入也陝音洽從夾內二人也陝州在弘農本陝縣後魏

改為州陝亦作狹亦作隄其義則隘也又如受音壽下從又容納也受音到下從犬姓也字形相疑似者多互書之不可不詳別也术字於篆文為𠂔不從木也而玉篇於木部中收术字則誤矣字書猶不免誤焉而況於流俗乎

曾

爾雅曰子之子為孫孫之子為曾孫郭璞注曰魯猶重也爾雅又曰父為考母為妣父之考為王父父之妣為

王母王父之考為曾祖王父王父之妣為曾祖王母郭璞注曰曾猶重也觀國案曾孫曾祖之曾當讀為層古人用層字只書作曾字曾孫者言重疊層層為孫也曾祖者言重疊層層為祖也故郭璞注爾雅曰曾猶重也則曾孫曾祖之曾音層可知矣信南山詩曰曾孫田之又曰曾孫之穡又曰曾孫壽考甫田詩曰曾孫來止又曰曾孫不怒又曰曾孫之稼又曰曾孫之庾大田詩曰曾孫是若行葦詩曰曾孫維主維天之命詩曰曾孫篤

之鄭氏箋曰魯猶重也自子孫之子而下事先祖皆稱
魯孫案鄭氏箋曰魯猶重也則詩凡言魯孫皆讀音魯
亦可知矣書曰惟有道曾孫周王發周禮詔女魯孫諸
侯百福禮記曰曾孫侯氏四正具舉凡此類言曾孫一
體也

北

許慎說文曰礪胡猛切僕也亦作北古文也故周禮有
北人掌金玉錫石之地鄭氏注曰北之言礪也金石未

成器曰礦觀國案礦亦作礪非亦作釗則非者古文礦字也周禮釋音非音胡猛切王荊公引詩總角非兮以釋非人之義取其有分別之義若然則非兮音慣而非人亦音慣矣若非人音慣則字書非人之非當弃而不用也故荊公字說收礦字而不收非字恐非字未可遽爾削去也禮記曰天子之六府有司貨鄭氏注曰司貨非人也陸德明音義曰非胡猛切義甚明也廣韻上聲於礦字訓曰金礦璞也於非字訓曰金玉未成器也又

二字分二切則誤矣禮部韻略上聲卅字胡猛切金玉
未成器也礦字古猛切銅鐵間石也亦誤矣蓋卅礦乃
一字一義也廣韻禮部韻略皆分作二字二義而所訓
二義又同而無別蓋廣韻唱其誤而禮部韻略襲其誤
也

湛

浮沈之沈亦作湛廣韻引漢書曰且從俗浮湛是也俗
書有從冗作沉者非是考之字書冗字甚字偏旁作通

用者亦多故沈亦作諶忱亦作懔疣亦作瘰妣亦作媼
跣亦作蹠然則沈亦作湛蓋古文也沈又音去聲讀音
鳩春秋宣公三年左氏傳曰蔡侯歸及漢執玉而沈又
襄公十八年左氏傳曰晉侯伐齊以朱絲係玉二穀而
禱沈玉而濟周禮以牡犗午貫象齒而沈之列子曰流
於北極沈於大海史記屈原傳曰屈原沈汨羅前漢溝
洫志曰自臨決何湛白馬玉璧又瓠子歌曰塞長茨兮
湛美玉後漢祭祀志曰沈用白馬珪璧各一晉書杜預

傳曰預為二碑紀其勲績一沈萬山之下一立峴山之
上凡此沈字皆讀音鳩者也當讀音鳩者不可移而為
平聲蓋義各有所歸耳

戲下

前漢高祖紀曰沛公已定關中羽大怒使黥布等攻破
函谷關遂至戲下高祖紀又曰諸侯罷戲下各就國顏
師古注曰戲音許宜反亦讀曰麾前漢衛青傳曰都尉
韓說從大軍出寘渾至匈奴右賢王庭為戲下搏戰獲

王封說為龍頌侯顏師古注曰戲讀曰麾又音許宜反
言在大將麾旗之下不別統衆也前漢灌夫傳曰馳入
吳軍至戲下顏師古注皆曰戲大將軍之旗也讀與麾
同又音許宜反觀國案顏師古每注皆存兩音者非也
今以史辭考之則戲下讀音麾是也其音許宜反者非
麾旗之戲蓋秦中自有地名戲者漢高帝紀曰陳涉之
將周章西入關至戲顏師古注曰戲許宜反戲在新豐
縣東今有戲水驛案後漢郡國志京兆新豐縣東有戲

亭師古注此新豐之戲已得當矣而於戲下之注又每引許宜反蓋師古牽於疑似而不能痛決之也灌夫傳又曰坐乃起稍稍去嬰去戲夫又曰蚡乃戲騎縛夫案此二戲字皆讀音麾嬰去戲夫者實嬰去而招麾令灌夫亦去也戲騎縛夫者田蚡指麾其從騎收縛灌夫也與戲下之戲同意

他音字

識志二字通用前漢溝洫志贊云孔子曰多見而識之

知之次也顏師古曰識亦作志記也劉歆移書責五經
博士曰文武之道未墜于地在人賢者志其大者不賢
者志其小者武成曰武王伐商往伐歸獸識其政事孔
安國曰記商家政事以為法周禮匠人營國為規識日
出之景與日入之景列子曰小子識之前漢郊祀志曰
鼎文鏤無款識凡此類識字皆讀為志也廣韻平聲曰
料落蕭切料理也去聲曰料力弔切度量也然則用料
理字當讀為落蕭切莊子曰疾走料虎頭編虎須音義

曰料音聊左太冲蜀都賦曰敷藥葳蕤落英飄飄神農
是嘗盧附是料蓋作平聲用料字也廣韻平聲曰屏府
盈切傍惶也又薄經切宸也去聲曰必郢切蔽也然則
用屏營字當讀作府盈切故李陵與蘓武詩曰屏營衢
路側執手野踟躕五臣注文選曰屏營恐懼也字書去
聲先音霰故繇詩云予曰有先後瞻仰詩曰不自我先
小弁詩曰尚或先之周禮虎賁氏掌先後王大司馬以
先愷樂春秋左氏傳曰先人有奪人之心引詩曰元戎

卜乘以先啓行凡此類音義皆曰蘓荐切故毛氏詩曰
相道前後曰先後也巾字讀為去聲者若歸去來云日
暮巾帟車左太沖吳都賦曰巾玉輅張景陽七命曰巾
雲軒凡此皆讀作去聲唯周禮巾車作平聲蓋周禮巾
車王禮也餘讀作去聲者上下通用也王字讀作去聲
者若詩之七月陳王業噫嘻成王春秋左傳曰霸王之
器也杜預春秋左氏傳序曰吾乃今知周公之德與周
之所以王又曰修春秋立素王又曰會成王義易傳曰

包犧氏之王天下孔安國尚書序曰伏羲氏之王天下
陸德明諸經釋音皆音為去聲也幹字上聲音管者若
賈誼弔屈原賦曰幹棄周鼎前漢百官公卿表曰治粟
內史有幹官又食貨志曰有五均六幹又曰幹在縣官
如淳注曰幹監鐵榷酒酤凡此皆讀音管也防字讀作
去聲者若杜預左氏傳序曰聖人包周身之防此類是
也胥字讀作上聲私呂切者若周禮以比追胥七歲屬
象胥桑扈詩曰君子樂胥受天之祜揚雄長楊賦曰酌

兕鑠肴樂胥聽廟中之雍雍受神人之福祐諸家音義
皆作音私呂切先達有通譯詩曰象胥尊周德偏師偉
漢功作去聲用胥字也幾字讀作去聲音異者若春秋
宣公十二年左氏傳曰庸可幾乎列子曰衆人守一狀
以求至智未可幾也揚雄解難曰孔子作春秋幾君子
之前覩也前漢郊祀志曰方士求神者莫驗然益遣幾
遇之又曰幾至殊庭焉漢文帝詔曰朕幾郊祀上帝諸
神王莽傳曰幾加元服委政而屬之凡此皆讀音異者

也草字讀音棘者若禮器曰詩云匪草其猶聿追來孝
檀弓曰夫子之病草矣又曰若疾草雖當祭必告此類
是也史記汲黯傳曰大將軍青侍中上踞廁而視之如
淳注曰廁音側孟康注漢書汲黯傳曰廁林邊側也今
案字書廁初吏切圖也間也次也側字韻中不收廁字
以此知廁字惟初吏切一音而已史記范雎傳曰卷以
簣置廁中春秋左氏傳曰如廁陷而卒史記李斯傳曰
見吏舍廁中鼠前漢呂后紀曰逐產殺之郎中府吏舍

廁中此皆廁圉之廁也史記樂毅傳曰廁之賓客之中
前漢谷永傳曰廁之爭臣之末此皆間次之廁也然則
廁字唯一音而如淳孟康皆出側音誤甚矣凡此皆字
有他音者童蒙多誤讀當先諭之

不

不字舉世讀為奔物切而諸字書並不收此音許慎說
文曰吊鳥飛上翔不下來也音方九切又甫鳩甫救二
切廣韻平聲曰不弗也甫鳩切又甫九切甫救切入聲

曰不與弗同分物切觀國竊詳廣韻入聲既收不字作分物切又注釋曰與弗同則讀不為弗矣考古人用不弗二字幾於通用論語曰公山弗擾以費叛而春秋定公十二年左氏傳曰公山不狃帥費人以襲魯書肩假曰辰弗集於房而春秋昭公十七年左氏傳曰辰不集于房論語曰舉一隅不以三隅反則不復也又曰夫子之言性與天道不可得而聞也而史記孔子世家曰舉一隅不以三隅反則弗復也又曰夫子言天道與性命

弗可得聞也已此古人以不弗二字通用之也蓋許慎
說文不收為奔物切故諸家字書皆不收然觀古人多
以不弗二字並句用之則知字書收字有未盡者而不
字當有奔物切之音也節南山詩曰天子是毗俾民不
迷不弔昊天不宜空我師弗躬弗親庶民弗信弗問弗
仕弗罔君子繇詩曰鼙鼓弗勝肆不殄厥愠亦不隕厥
問山有樞詩曰子有庭內弗洒弗埽子有鐘鼓弗鼓弗
考子有酒食何不日鼓瑟雨無正詩曰浩浩昊天不駿

其德昊天疾威弗慮弗圖生民詩曰克禋克祀以弗無
子不圻不副無菑無害抑詩曰人亦有言靡哲不愚女
雖湛樂從弗念厥紹桑桑詩曰匪言不能胡斯畏忌維
此良人弗求弗迪凡此詩皆於一篇中用不弗二字相
聯屬而成文也大禹謨曰罰弗及嗣與其殺不辜寧失
不經益稷曰帝不時敷同啟呱呱而泣予弗子甘誓曰
汝不恭命弗用命戮于社五子之歌曰十旬弗反民可
近不可下湯誓曰予畏上帝不敢不正有衆率怠弗協

湯誥曰弗忍荼毒將天命明威不敢赦伊訓曰山川鬼神亦莫不寧于其子孫弗率太甲曰茲乃不義予弗狎于弗順盤庚曰汝曷弗告朕若火之燎于原不可向邇說命曰茲故弗言罔不同心康誥曰啓不畏死罔弗憝召誥曰奈何弗欽王不敢後用洛誥曰厥攸灼叙弗其絕儀不及物君奭曰天命不易弗克經歷泰誓曰惟日不足弗克若天凡此書皆於一篇中用不弗二字相聯屬而成文也周禮弓人曰居旱亦不動居濕亦不動苟

有賤工雖善亦弗可以為良矣禮記祭義曰先王之教
因而弗改錯諸天下無所不行曾子問曰不得嗣而為
兄弟女氏許諾而弗敢嫁檀弓曰豈不得以噫弗果從
王制曰不及以政示弗故生也中庸曰不勉而中不思
而得有弗學學之弗能弗措也緇衣曰未見聖若已弗
克見既見聖亦不克由聖凡此禮皆於一篇中用不弗
二字相聯屬而成文也易大壯象曰君子以非禮弗履
又小象曰不能退不能遂不詳也隨卦初九小象曰出

門交有功不失也六二小象曰係小子弗與也由此
觀之則不字當有奔物切之音而字書收字有未盡蓋
可見矣許慎說文不載之字甚多要當以類求之爾神
農本草于菜部載落蘊世謂之茄子讀茄為伽音而字
書茄子止音伽無伽音也打字世呼作丁寡切而字書
打字唯音頂無丁寡切之音也若此者古今呼之久矣
雖欲廢之不可得也

美

字書曰美似面切欲也又延面切餘也延也采芑詩曰
方叔涖止其車三千師干之試鄭氏箋曰司馬法兵車
一乘甲士三人步卒七十二人宣王承亂美卒盡起陸
德明音義曰美似面切今案鄭氏所謂美卒盡起者謂
餘卒盡起也當音美為延面切音義誤也周禮小司徒
曰凡起徒役毋過家一人以其餘為美鄭氏注曰美饒
也陸德明音義曰美似面切今案以其餘為美者家一
人之外有餘夫則免其常役以備非常唯田與追胥竭

作則凡有田獵盜賊之事雖饒餘之夫盡行矣當音美
為延面切音義亦誤也所謂無然歆美所謂臨淵羨魚
皆似面切也所謂壁羨以起度所謂葬有羨道皆延面
切也其它經史所稱羨字皆當以義推之灼然知其音
矣又衍延二字亦有延面切之音板詩曰及爾游衍陸
德明音義曰衍以戰反後漢安帝紀曰罷魚龍曼延百
戲章懷太子注曰延以戰反蓋延面切與以戰反同一
音也前漢地理志江夏郡有沙羨縣晉灼注曰羨音夷

此又羨字之有別音者字書不載蓋地名有別音者字書多不載如前漢地理志右扶風有獫狁縣獫音胎東海郡有承縣承音證越雋郡有卑水縣卑音班樂浪郡有黏蟬縣蟬音提此類是也

攘

甫田詩曰曾孫來止以其婦子饁彼南畝田畯至喜攘其左右嘗其旨否鄭氏箋曰攘當讀作饁觀國案玉篇曰攘仁尚切揖攘也又汝羊切攘竊也廣韻平聲曰攘

汝羊切去聲曰攘仁尚切引文字指歸曰揖攘也然則古之揖攘字用此攘字詳詩言攘其左右當為揖攘之攘也鄭氏謂攘當為饗者饗音餉其義則饋也爾雅曰饁饋饗也詩先言饁彼南畝則既已饗饋矣然後揖攘其左右而嘗其旨否於先後之序為不紊若讀攘為饗則既收其字形又改其字音併與其義而紊焉陸德明音義曰攘音饗又音餉亦誤矣良耜詩曰其饗伊黍詩中自有饗字豈可改攘為饗也前漢藝文志道家者流

曰此君人南面之術也合於堯之古攘又司馬遷傳曰孔子至於今五百歲有能紹而明之正易傳繼春秋本詩書禮樂之際意在斯乎小子何敢攘焉又司馬相如傳封禪書曰進攘之道何其爽與顏師古注皆曰攘仁尚反古人固每用此攘字為揖攘之攘矣理甚明也

彎關貫

許慎說文彎字烏環切持弓彎關矢也南史蒯恩傳曰彎弓三石是也而古人以關貫二字與彎通用之春秋

昭公二十一年左氏傳曰城怒而反之將注豹則關矣
杜預曰關引弓也陸德明音義曰關烏環反孟子曰越
人關弓而射之其兄關弓而射之凡此皆用關字為彎
字也史記陳涉世家引賈誼過秦論曰士不敢貫弓而
報怨又伍子胥傳曰使者捕伍胥伍胥貫弓執矢向使
者裴駟注曰貫烏環反凡此用貫字為彎也關貫二字
於字書未嘗音作彎古人假借依其聲類而用之也亦
如藏者隱藏也賊者姦賊也臧者臧否也史家於三字

皆以臧字當之蓋藏賦臧三字義不同亦不同音是亦依其聲類而借用之取其意通而已

闕

字書闕字分三音一音烟一音謁一音曷爾雅曰太歲在甲曰闕逢此闕字讀音烟也史記歷書曰其更以七年為太初元年年名馬逢攝提格史記用馬字以代闕字則闕逢音烟可知矣太歲在寅曰攝提格馬逢攝提格者甲寅年也而爾雅釋音曰闕烏割反誤矣前漢句

奴傳曰冒頓閼氏生少子顏師古注曰閼氏匈奴皇后
號閼音烟氏音支凡閼字讀音烟字者此類是也爾雅
曰太歲在卯曰單閼此閼字讀音謁廣韻曰閼於歇反
引爾雅太歲在卯曰單閼則單閼之閼音謁可知矣賈
誼鵬鳥賦曰單閼之歲兮四月孟夏史記賈誼傳前漢
賈誼傳文選服鳥賦皆音閼為烏葛反皆誤矣若夫閼
音曷者如天閼壅閼之類是也夫字有忽於目前之習
而誤為音呼者皆此類

藉

許慎說文曰藉秦昔切帝藉千畝也故天子躬耕謂之
藉田前漢食貨志曰文帝即位時民近戰國背本趨末
賈誼上書上感誼言始開藉田躬耕以勸百姓南朝宋
有藉田令皆只用藉字藉以借民力為義天子躬耕三
推借民力以勸天下也漢文帝詔曰農天下之本也其
開藉田漢書於食貨志用藉字而於帝紀用藉字二字
義同可通用之也蓋藉字有二音一音秦昔切一音慈

夜切其音秦昔切者若藉田若狼藉若晉大夫藉談之類是也其音慈夜切者若繅藉五采若藉用白茅若一茅三脊以為藉若藉手以拜之類是也古人用字多假借亦或作藉甚至於蘊藉字又或用緼藉史記義縱傳曰敢行少蘊藉前漢義縱傳曰敢往少溫藉顏師古注曰藉慈夜切史記漢書又皆以藉字為慈夜切用之蓋所謂假借者如此揚子法言曰破楚入郢鞭尸藉館釋音藉慈夜切又慈亦切觀國案左傳曰庚辰吳入郢以班

處宮是假楚之宮以為己宮當音藉館之藉為慈夜切而揚子釋音不能決乃列兩音則非也春秋襄公二十三年左氏傳曰孟氏將辟藉除於臧氏杜預注曰辟穿藏也於臧氏借人除葬道陸德明音義曰藉音借觀國策杜預謂借人除葬道故藉字當讀作慈夜切而音義者不悟遂音藉為借誤矣

介今

許慎說文曰介兒氏切麗介也介詞之必然也廣韻曰

爾汝也義與尔同然則尔者乃爾字之首也後世既書
爾為爾而平其首又改尔為尔是俗書也姓有尔朱氏
尔綿氏只用尔字蓋得姓之始用尔字固不可變尔而
為爾也後世俗書乃作爾字故書彌為弥書孌為妳書
禰為祢書彌為弥皆非字法也而俗書尔字亦作尔如
書珍為尔書軫為軫書診為妳書參為参之類皆因草
書尔字為尔形故隸書亦從而變之然失字法益遠矣
說文曰尔稠髮也引詩尔髮如雲亦作鬢而今世所傳

毛公詩君子偕老篇曰鬢髮如雲毛公訓曰鬢黑髮也
蓋黑者色也與稠義不同既曰今稠髮又曰鬢黑髮則
今與鬢異訓矣然則許慎所引詩當是別本詩作今字
而毛公詩作鬢字今鬢二字雖通用而訓釋者不當有
二義也

鰕鯖鱸

鰕字案字書七逾切淺鰕也又徂鉤切魚名也又仕垢
切小人貌也史記張良世家云沛公曰鰕生教我距關

無內諸侯徐廣注曰鰕魚也仕垢反前漢張良傳云沛
公曰鰕生說我距關毋納諸侯服虔注曰鰕七垢反小
人也觀國案鰕生小人也當讀為仕垢反徐廣以為鰕
魚非也史記貨殖傳曰鰕千石鮑千鈞徐廣注曰鰕音
鰕鰕魚也觀國案鰕千石者鰕音徂鈞切魚也若夫鰕
音輒雖亦魚名豈可變鰕為鰕也蓋鰕從取鰕從取亦
音輒偏旁皆異也徐廣謂鰕音輒亦誤矣廣韻上聲曰
鰕仕垢切一曰姓漢有鰕生觀國案廣韻所謂漢有鰕

生者豈非以張良傳鰕生為姓鰕之人邪誤又甚矣鯖
音青魚名也南史虞棕傳曰棕善為滋味齊帝就棕求
飲食方棕秘不出帝醉後體不快棕乃獻醒酒鯖酢一
方而已鯖又音征亦作鬻亦作𩺰煮魚煎食謂之五侯
鯖蓋魚之熟羞者也後漢楊震傳曰有冠雀銜三鱸魚
飛集講堂前章懷太子注曰案續後漢書及謝承書鱸
字皆作鰕又引郭璞注爾雅曰鱸知然反大魚似鰕而
短鼻口在頷下大者長二三丈江東呼為黃魚觀國案

字書鰾字亦作鱣謝承漢書作三鰾范蔚宗改為鱣字
鰾鱣一也章懷太子不當引郭璞注爾雅故後人皆誤
讀作知然反也蓋音知然反者若碩人詩曰鱣鮪發發
四月詩曰匪鱣匪鮪潛詩有鱣有鮪注皆曰鱣大魚也
賈誼弔屈原賦曰橫江湖之鱣鰾今固將制於螻蟻文
中子曰江湖鱣鯨非溝瀆所容郭璞江賦曰江豚海狶
叔鮪王鱣凡此言鱣即爾雅注所謂長二三丈者也一
冠雀豈能銜三大魚長二三丈者耶然則三鱣為三鰾

明矣韓子曰鱣似蛇正謂此也案字書字之從單者與從亼多通用故禪亦作禪蟬亦作蟪蟬亦作儻蟬亦作鱣則三鱣為三蟬可以無疑矣杜子美夔府詠懷詩曰敕厨一味求飽或三鱣作平聲旃音蓋承誤用之也

糲

南史顏竣傳曰宋明帝時歲旱人饑中書令顏竣上言禁糲一月息米萬斛觀國案集韻曰糲音唐精米也諸字書皆無糲字唯集韻收此字蓋因顏竣傳有此字而

集韻收之耳凡米初出糠粃而未精熟則謂之麤糲其
得米則多及精熟之則得米少禁糲者唯食粗糲而不
得精熟米也然人之常情與其食粗糲之十寧且食精
熟之八不知顏竣當時禁糲如何設法而月能息米萬
斛其公米耶其民米耶不可得而知也字書有暘字音
蕈又有師字音伐二字皆訓曰精米也今江浙荆湖間
人凡精米皆呼此二音其字義則與糲同

茸俾

前漢司馬遷荅任少卿書曰李陵既生降隕其家聲而僕又茸以蠶室蘓林注曰茸次也顏師古注曰茸音人勇反推也蠶室乃腐刑所居溫密之室謂推致蠶室之中也文選司馬遷荅任少卿書曰李陵既生降隕其家聲而僕又佁之蠶室五臣注曰佁次也音二觀國案班固作司馬遷傳去司馬遷未遠必據司馬遷文用茸字其義如顏師古注文意通也字書曰搯人勇切推也當用搯字班固省其偏旁故用茸字耳自班固作漢史後

又歷四百餘年梁昭明太子始集文選既不依司馬遷傳作茸字而變為𠂔字是必得於它書也它書所傳司馬遷文歷年既久豈無訛謬然則茸𠂔二字義雖均通猶當以漢書為正况𠂔之義偏乎

蛾

禮記學記篇曰夫然後足以化民易俗近者悅服而遠者懷之此大學之道也記曰蛾子時術之其此之謂乎鄭氏注曰蛾蚘蜉也蚘蜉之子微蟲耳時術蚘蜉之所

為其功乃復成大垤釋音曰蛾魚倚反觀國案爾雅曰
蚳蚳大蝗小者蝗廣韻曰蝗蚳蚳也同作蟻亦作蛾蓋
蛾者蟻之省文也學記之文自始學積而至於大學自
小成充之至于大成從微至著積習有漸故取譬以蛾
子自微積功以成大垤也其云記曰蛾子時術之則古
書有此語矣說禮之家引此語以為喻也書史亦多用
蝗為蛾字者春秋僖公二十五年左氏傳曰蛾析謂鄭
慶盍行乎釋音曰蛾魚倚反列子曰先會鬼神魑魅次

達八方人民未聚禽獸蟲蛾揚雄長楊賦曰稽顙植頤
扶服蛾伏顏師古注曰蛾與蟻同言伏如虫蛾也漢元
帝紀建昭元年秋八月有白蛾羣飛蔽日從東都門至
枳道顏師古注曰蛾若今之蠶蛾案此言白蛾者乃白
蟻也非蠶蛾若蠶蛾之蛾則與俄同音與俄同音者若
詩曰螭首蛾眉爾雅曰蠶羅之類是也

姓名異音

禮記檀弓篇曰知悼子卒未葬平公飲酒杜蕢自外來

聞鐘聲鄭氏注曰杜蕢或作屠蒯春秋昭公九年左氏傳曰晉荀盈卒未葬晉侯飲酒樂膳宰屠蒯趨入釋音曰屠音徒觀國案蕢與蒯同音苦恠切音同而字不同母傷也若杜與徒乃二音唯姓與名當專一音不可以呼二音當是屠字亦讀音杜左氏假借用屠字耳史記孟嘗君傳有馮謹裴駟注曰驪音歡又作煖音許袁反觀國案驪煖二字不同音當是有兩名如袁盎又名絲之類是也若夫左傳言驪姬又言麗姬而字書有嬖姬

三字不同而同音驪也史記言鄜山漢書言麗山唐書
言驪山三字不同音而同音驪也史記言朝錯又言晁
錯漢書言鼂錯三字不同而同音晁也書史謚閔者或
作愍或作湑三字不同而同音閔也謚僖者亦作釐福
禧者亦作釐裁成者亦作財才智者亦作財凡此字異
而音同者意通斯可矣漢書匈奴傳言犬夷又言猷夷
又言昆夷而顏師古注又云與混夷緄夷同音工本反
凡此字雖不同而各有一義或出於假借亦不為舛也

蘊

許慎說文曰蘊積也於粉切玉篇曰蘊藏也積也聚也蓄也廣韻曰蘊藏也俗作蘊引春秋蘊利生孽觀國案春秋隱公三年左氏傳曰蘋蘩蘊藻之菜杜預注曰蘊藻聚藻也又六年傳曰見惡如農夫之務去草馬莧夷蘊崇之絕其本根杜預注曰蘊積也又襄公十一年左氏傳曰凡我同盟毋蘊年杜預注曰蘊積也蓋皆用從溫之蘊則知蘊為俗書矣蘊又音於問切史記酷吏義

縱傳曰敢行少蘊藉前漢義縱傳曰敢往少溫藉顏師古注曰少溫藉言無所含容也又馬宮傳贊曰服儒衣冠傳先王語其醞藉可也顏師古注曰醞藉如醞釀及薦藉道其寬博重厚也唐書李林甫傳曰兵部侍郎盧絢按轡絕道去帝愛其醞藉凡此或用蘊字或用溫字或用醞字皆讀為於問切有含蓄重厚之意古人多假借用字故蘊溫醞三字雖不同而其義則皆同於蘊以此知訓醞為醞釀者非也易曰乾坤其易之緼耶韓康

伯注曰縕淵與也案字書縕泉也絮也繇也亂也與易
意不合蓋亦當用蘊字易省文用縕字耳所謂淵與亦
含蓄之異稱也雲漢詩曰旱既太甚蘊隆蟲蟲毛氏傳
曰蘊蘊而暑史記義縱傳用蘊藉皆用俗書蘊字者蓋
變古文為隸變隸為今文書史中字多失其原不足恠
也南史王蘊字彥深以俗書為名尤不可

閭

史記酷吏鄧都傳曰濟南閭氏宗人三百餘家豪滑二千

石莫能制裴駟注引漢書音義曰睺音小兒癩病之癩
前漢邳都傳曰濟南睺氏宗人三百餘家應劭注曰睺
音馬睺眼之睺顏師古注曰睺音閑觀國策王篇曰睺
胡間切眇也廣韻曰睺胡間切人目多白又姓史記有
濟南睺氏然則音閑是也馬一目白為駟而人目白為
睺孟子曰王使人睺夫子果有以異於人乎又曰而未
嘗有顯者來吾將睺良人之所之也此睺字亦音閑其
義則所謂眇也眇者斜視也成覲謂齊景公曰彼丈夫

也我丈夫也此覲字音古覲切其義則視也史記十二諸侯年表宋惠公名覲與成覲之名同陽貨覲孔子之亡也而饋孔子烝豚孔子亦覲其亡也而往拜之此覲字音苦暫切亦視也在字書為瞰亦作矚揚雄解嘲曰鬼瞰其室光武紀曰雲車十餘丈瞰臨城中此類是也矚矚矚三字三音其義各有攸處

鷓鴣

前漢黃霸傳曰霸代丙吉為丞相京兆尹張敞舍鷓鴣

飛集丞相府霸以為神雀議欲以聞蘓林注曰今虎賁所著鵠也顏師古注曰此鵠音芬字本作鵠此通用耳鵠雀大而色青出羌中非武賁所著也武賁鵠者黑色出上黨以其闕死不止故用其尾飾武臣今時俗所謂鵠鷄者也音曷非鵠雀也觀國案玉篇曰鵠何葛切鳥似雉而大青色有毛角闕死乃止又曰鵠扶云切鵠雀似鵠以此觀之則黃霸傳所謂鵠雀者鵠雀也以其似鵠故亦謂之鵠雀耳顏師古以為鵠鵠通用非也蘓林

以為虎賁所著鵠亦非也虎賁所著者鵠鳥乃鷄雉之
屬不謂之雀後漢輿服志曰虎賁武騎皆鵠冠虎文單
衣襄邑歲獻織成虎文鵠者勇雉也其鬬對一死乃止
故趙武靈王以表武士秦施之焉徐廣注曰鵠似黑雉
出于上黨荀綽晉百官表注曰冠挿兩鵠鷙鳥之暴疏
者也每所攫撮應爪摧衄天子武騎故以冠焉傳五賦
注曰羽騎戴鵠廣韻曰鵠鳥似鷄鬬必至死推此類以
觀之則鵠非羣飛集於舍屋之物則黃霸傳鵠雀非鬬

死之鵩可知已前漢藝文志道家者流有鵩冠子一篇
班固注曰楚人也居深山以鵩為冠顏師古注曰以鵩
鳥羽為冠然鵩冠子不顯姓名蓋其人當時偶以鵩羽
為野服因名曰鵩冠子非取於武勇之義也韓愈有讀
鵩冠子文曰鵩冠子十有六篇其辭雜黃老刑名其博
選篇四稽五至之說當矣使其人遇其時援其道而施
於國家其功德豈少哉觀國嘗讀其書矣以虛無為宗
而變至於參合機會之際其說不純乎先王之仁義蓋

戰國之際好異之人也

並

史記秦始皇紀曰並海上北至瑯邪又曰遂並海西至平原津又曰並海南至會稽又封禪書曰上乃遂去並海上北至碣石又大宛傳曰留歲餘還並南山欲從羌中歸前漢郊祀志曰始皇南至湘江遂登會稽並海上又曰二世元年東巡碣石並海又曰皆在齊北並渤海又溝渰志曰並北山東至洛三百餘里又薛宣傳曰三

輔賦歛無度酷吏並緣為姦以上並字顏師古注曰並
步浪反列子曰孔子使人並涯止之唐書李適傳曰春
幸梨園並渭水祓除此並字亦皆讀音步浪反者也並
音步浪反者其義與旁字遵字同前漢揚雄傳曰武帝
廣開上林旁南山而西至長楊五柞孟子曰吾欲觀於
轉附朝儻遵海而南放于瑯邪是也字書並字無步浪
反之音古人借音用之耳前漢地理志牂牁郡有同並
縣應劭注曰並音伴字書亦無此音亦借音也

貲訾

字書貲字即移切貨財也訾亦即移切思也二字雖同音而義不同然古人于二字通用之史記司馬相如傳曰相如以貲為郎前漢司馬相如傳曰相如以訾為郎顏師古注曰訾讀與貲同訾財也以家財多得拜為郎觀國案司馬相如傳在史記用貲字在漢書用訾字則貲訾二字通用之也前漢張釋之傳曰釋之以貲為騎郎如淳注曰漢法貲五百萬得為常侍郎所謂以貲為

郎者乃今之入粟也故黃霸傳曰武帝末以待詔入錢
賞官補侍郎謁者後復入穀補左馮翊卒吏又卜式傳
曰輸家財半助邊拜中郎楊僕傳曰以千夫為吏顏師
古注曰千夫武功賞官令民出錢穀為之凡此皆入貲
補官者也司馬相如張釋之黃霸卜式皆漢名臣而皆
以入貲進後世乃或恥居之何邪漢景帝後元二年詔
曰今訾算十以上廼得官庶士無訾又不得官朕甚慙
之訾算四得官亡令庶士久失職以此觀之則漢時庶

士亦不以入訾為恥也史記貨殖傳曰擅其利數世家亦不訾前漢枚乘傳曰舉其兵以訾于漢譬猶蠅蚋之附羣牛又食貨志曰豪富吏民訾數鉅萬又貨殖傳曰成都羅裒訾至鉅萬臨菑姓偉訾五千萬雒陽張長叔薛子仲訾亦十千萬長安王君房樊少翁王孫大卿為天下高訾凡此言訾當用貨借用訾字爾訾又音紫字書曰訛病也毀也書史與訾訾二字通用小旻詩曰俞俞訛訛亦孔之哀毛氏傳曰訛訛然思不稱其上也召

旻詩臯臯訛訛曾不知其玷毛氏傳曰訛訛竊不共事也曲禮曰不苟訾鄭氏注曰不欲見毀訾也史記貨殖傳曰以故訾竊偷生無積聚徐廣注曰訾竊苟且惰懶之謂也前漢地理志曰訾竊偷生而亡積聚潘安仁西征賦曰訾孝元於渭塋曹子建與楊德祖書曰罪三王訾五霸此類是也訾又姓也前漢元帝功臣侯年表有樓虛侯訾順

睢睢

睢字七余切與徂同聲旁從且也睢字息遺切與雖同聲旁從目也又許葵切詩曰關關雎鳩在河之洲毛氏傳曰雎鳩王雎也鳥摯而有別后妃樂君子之德慎固幽深若雎鳩之有別也爾雅曰雎鳩王雎郭璞注曰雎鳩雕類今江東呼之為鷀好在江渚水邊食魚鳥摯而有別也玉篇曰雎七余切王雎也又次雎行難也凡此謂雎字從且者也前漢地理志臨淮郡有雎陵縣梁國有睢陽縣班固曰睢陽故宋國顏師古注曰雎音雖玉


篇曰睢息遺切水名又許葵切視貌廣韻曰睢息遺切
水名在梁郡亦作睢春秋成公十五年左氏傳曰出舍
于睢上史記漢書高祖紀皆曰大戰彭城靈璧東睢水
上多殺士卒睢水為之不流後漢郡國志梁國睢陽縣
劉昭注引北征記曰睢陽城周三十七里又引地道記
曰梁孝王築睢陽城小鼓唱節杵下而和之稱睢陽曲
凡此睢字皆睢水之睢也其音許葵切者睢盱也視貌
也莊子所謂而睢睢而盱盱是已睢睢二字音與義皆

不同蓋其字偏旁實異也

封窆

周禮冢人掌公墓之地以爵等為丘封之度與其植數
共喪之窆器鄭氏注曰丘封之度與其植數別尊卑也
窆器下棺豐碑之屬引喪大記曰凡封用綽去碑負引
釋音曰封音彼驗反觀國案易大傳曰古之葬者厚衣
之以薪葬之中野不封不植喪期無數後世聖人易之
以棺槨蓋取諸大過檀弓云國子高曰葬也者藏也藏

也者欲人之弗得見也反壤植之哉所謂壤植乃封植也封者封土為墳也植者植木為飾也窆者下棺也後世說禮之家乃假封字為窆字故鄭氏訓窆器引喪大記凡封用綽則假封字為窆字可知矣



學林卷十